

Ո Ր Ո Շ ՈՒ Մ թիվ-269
Վարչական տույժ նշանակելու մասին

«29» հոկտեմբերի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Հոսսեին Յուսեֆալի Զարեհեսկիկանդի վերաբերյալ նյութերը.

Պ Ա Ր Զ Ե Ց Ի '

2020 թվականի հուլիսի 25-ին ՀՀ ՊԵԿ ՄԴՊ վարչության աշխատակիցները Մեղրիի մաքսային կետ-բաժնի տարածքում գննության են ենթարկել ՀՀ-ից ԻԻՀ մեկնող Հոսսեին Զարեհեսկիկանդի կողմից շահագործվող «VOLVO» մակնիշի 92A605-10 հաշվառման համարանիշի բեռնատար ավտոմեքենան, ինչի արդյունքում նշված ավտոմեքենայի վարորդի խցիկից և նրա տեղադրված աէրոդինամիկ ծածկի արանքից հայտնաբերվել են, մաքսային հսկողությունից թաքցրած, երկու պայուսակ, որոնցում առկա են եղել 14 հատ շան ձագ, 11 հատ անասնաբուժական վկայական և 15 հատ օգտագործված ներարկիչ:

Փաստի առթիվ Հոսսեին Զարեհեսկիկանդի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ իրավախախտման անմիջական օբյեկտ հանդիսացող 14 հատ շան ձագը և 11 հատ անասնաբուժական վկայականը վերցվել և ի պահ է հանձնվել ՄԴՊ վարչության շնագիտական բաժին: Այնուհետև 14 հատ շան ձագն ի պահ է հանձնվել Հոսսեին Զարեհեսկիկանդին դրանց պահպանությունն իրականացնելու նպատակով:

Վերոնշյալ 14 հատ շան ձագի շուկայական արժեքը 2020 թվականի հուլիսի 26-ի դրությամբ որոշելու համար 11.08.2020թ. նշանակվել է ապրանքագիտական փորձաքննություն, որի կատարումը հանձնարարվել է ՀՀ ԳԱԱ «Փորձաքննությունների ազգային բյուրո» պետական ոչ առևտրային կազմակերպության փորձագետին:

ՀՀ ԳԱԱ «Փորձաքննությունների ազգային բյուրո» ՊՈԱԿ փորձագետի 07.10.2020թ. թիվ 20-0073 Պ եզրակացության համաձայն՝ փորձաքննությանը ներկայացված 14 հատ շան ձագից, 11 հատի շուկայական արժեքը 2020 թվականի հուլիսի 26-ի դրությամբ կազմել է 2190000 ՀՀ դրամ, իսկ թվով 3 (երեք) անասնաբուժական վկայական չունեցող շան ձագերը չեն գնահատվել:

Պարզելու համար, թե որքան է կազմել Հոսսեին Զարեհեսկիկանդի կողմից, թաքցնելով ՀՀ մաքսային սահմանով տեղափոխված, 11 հատ շան ձագի մաքսային արժեքը և առաջացել է ոչ սակագնային կարգավորման միջոցների չկիրառում, թե ոչ, վարչական վարույթի ընթացքում 29.10.2020թ. հարցում է կատարվել ՀՀ ՊԵԿ մաքսային հսկողության վարչություն, որտեղից ստացված գրության համաձայն ՀՀ ԳԱԱ «Փորձաքննությունների ազգային բյուրո» ՊՈԱԿ փորձագետի 07.10.2020թ. թիվ 20-0073 Պ եզրակացության հետազոտության բաժնում նկարագրված վերոնշյալ ապրանքների մաքսային արժեքը 27.07.2020թ. դրությամբ, ֆիզիկական անձի կողմից ՀՀ-ից ԻԻՀ արտահանման դեպքում կկազմի 2190000 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ

վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

Հոսսեին Զարեհեսկիկանդը 11.10.2020թ. ծանուցագրով 2020 թվականի հոկտեմբերի 29-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2020 թվականի հուլիսի 26-ին ԻԻՀ քաղաքացի Հոսսեին Զարեհեսկիկանդը, թաքցնելով՝ ապրանքների հայտնաբերումը դժվարացնող եղանակով, իր կողմից վարվող «VOLVO» մակնիշի 92A605-10 հաշվառման համարանիշի բեռնատար ավտոմեքենայի վարորդի խցիկում և նրա տեղադրված աէրոդինամիկ ծածկի արանքում ՀՀ մաքսային սահմանով տեղափոխել է 2190000 ՀՀ դրամ մաքսային արժեքով շան ձագ, այսինքն՝ թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, ՀՀ ԳԱԱ «Փորձաքննությունների ազգային բյուրո» ՊՈԱԿ փորձագետի 07.10.2020թ. թիվ 20-0073 Պ եզրակացությամբ և ՀՀ ՊԵԿ մաքսային հսկողության վարչության գրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Հոսսեին Յուսեֆալիի Զարեհեսկիկանդին (ծնված՝ 21.09.1971թ., ԻԻՀ քաղաքացի, բնակվող՝ ՀՀ, ք. Բոսթանաբաթ, անձնագրի համարը՝ V47557123) ճանաչել զանցառու ՀՀ

մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված 11 հատ շան ձագի մաքսային արժեքի չափով՝ 2190000 ՀՀ դրամ: /900005024055 (կող-19) հաշվեհամարին/

2. Որոշման մասին հայտնել Հ. Զարեհեսկիկանդին՝ պարզաբանելով, որ ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ